

Акафист святым равноапостольным Мефодию и Кириллу

*Празднование 27 (14) февраля, 19 (6) апреля,
24 (11) мая,*

Кондак 1

Избранныи от Царя сил Господа Иисуса во апостоли языком словенским, Мефодие и Кирилле богомудрии, песньми восхваляем вас, предстателей наших; вы же, яко имущии дерзновение ко Господу, от всяких нас напастей предстательством вашим свободите, зовущих: Радуйтесь, Мефодие и Кирилле, язык словенских апостоли и богомудрии учителяе.

Икос 1

Ангелов Творец и Господь сил предустави вас быти просветители языком словенским; того ради и благодать Его бе с вами, ограждаючи и укрепляючи вас во вся дни живота вашего юже помощницу себе имуще, славу Божию во градах и пустынях делы и словесы вещали есте всем. Темже и мы, яко отрасль язык, верою Христовою от вас просвещенных, воспеваем вам, глаголюще:

Радуйтесь, радости Евангельския благовестителие; Радуйтесь, чудодейственныя благодати носителие. Радуйтесь, скорби многи за имя Господне приявшии; Радуйтесь, прелести мира сего отвергшии. Радуйтесь, издетска Богом благословеннии; Радуйтесь, венцы исповедническими от Него украшеннии. Радуйтесь, яко славу человеческую презревше, в пустыни Господа искали есте; Радуйтесь, яко волю Его сильным мира сего со многим дерзновением

благовестили есте. Радуйтесь, сих ради от Владыки всех в рай светел приятии; Радуйтесь, пред Ним наши теплии ходатаи. Радуйтесь, яко вашими молитвами вере нашей утверждение имамаы; Радуйтесь, яко предстательством вашим ересей одоление стяжахом.

Радуйтесь, Мефодие и Кирилле, язык словенских апостоли и богомудрии учителяи.

Кондак 2

Видев святыи Кирилл, еще сый отрок, в ноци видение, яко избрати ему Софию деву сестру себе, родителем сия поведат. Тии же, разумевше зде волю Божию, во еже быти чаду их премудрости служителю, вельми о научении и наказании его пекошася, зряще же скорое его в разуме преспеяние, пояху Богу: Аллилуиа.

Икос 2

Разум недоразуменный и естество сущих испытуя, Кирилл в премудрости паче сверстник своих преспеваше и, еще отрок сый, прославися, и в палатех царских во образ благий юному сыну цареву водворен бе. Но, богатство и славу земную презрев и еже едино на потребу спасения ища, в пустыню вселися, да пощеньми и молитвами безстрастия достигнет. Сих же ради и Мефодий, воевода уже сый, отыде на гору Олимп, идеже яко инок Господу служаше. Темже научимся и мы искушения мира презирати, наипаче же Христу Богу угождати, угодники Его воспевающе сице:

Радуйтесь, славою, яже от человек, не прельстившиися; Радуйтесь, пустынножительству

крепце прилепившиися. Радуйтесь, яко Господь просвещал вы есть в сонних и видениях; Радуйтесь, яко и мудрость человеческая пособствова вам во спасение. Радуйтесь, яко Слово Божие и святых отец писания паче философии возлюбили есте; Радуйтесь, яко Господня закона не слышателие забытливии бысте, но творцы. Радуйтесь, яко козни диавольския, на пустынножители находящия, победили есте; Радуйтесь, яко сих ради дадеся вам власть над искушеньми и страстьми. Радуйтесь, яко подвизи ваша стяжаша вам венец живота; Радуйтесь, яко и ныне подвижником и постником пособници есте. Радуйтесь, всем грешным пред Богом блазии заступници; Радуйтесь, душ наших от лести сатанинския защитници.

Радуйтесь, Мефодие и Кирилле, язык Словенских апостоли и богомудрии учителяе.

Кондак 3

Сила молений царевых понуди святаго Кирилла пустыню оставити служения ради пастырска в Цареграде, идеже славу Божию ученьми и дела вещаше и ересь иконоборную посрамляше. Темже и нас, о святой отче, в православии утверди, отпадшия же от истинныя веры единоплеменники наша к единоверию возврати, да вси словене едиными усты вопиют о просветителех своих Христу Богу: Аллилуиа.

Икос 3

Имея премудрости силу, потекл еси, святой Кирилле, с монахом Георгием ко агаряном стязания ради о вере, и от святаго Григория Богослова духовно

просвещаем, премудрость тайны Святыя Троицы во мнозех подобиих показал еси, посрамляя нечестивых силою словес твоих. Тии же, завистию распаляеми, восхотеша зелием погубити тя, егоже вкушь, не претерпел еси вреда, но здрав прибыл еси ко святому Мефодию во обитель и с ним купно иноческия труды паки подъял еси, и просветися пустыня подвигов ваших светом. Темже и нас предстательством вашим просветите, любовию поющих:

Радуйтесь, доброгласнии славы Божия кимвали; Радуйтесь, Церкви Его твердии столпи. Радуйтесь, тайну Троицы в подобиих проповедавшии; Радуйтесь, воплощение Бога Слова пред сарацины нетрепетно исповедавшии. Радуйтесь, еллинов и иудеев и варваров просветителие; Радуйтесь, Триединого Божества благовестителие. Радуйтесь, яко вами посрамися леть иконоборная; Радуйтесь, яко от вас увядает нечестие агарянское. Радуйтесь, яко истину Христову неведущии имут вы учителя; Радуйтесь, яко искушаемии сомнением обретают вы в вере наставители. Радуйтесь, яко прогневавшии Господа имут вас пред Ним предстатели; Радуйтесь, яко угождающи Ему имеют вы покровители.

Радуйтесь, Мефодие и Кирилле, язык словенских апостоли и богомудрии учителяе.

Кондак 4

Бурю различных бед и зол, на языки словенския находящую, предстательством вашим разорите, преподобнии, яко служений многих жребий прияли есте, и во апостольстем бо лице, и в преподобных сонме, и во учителей чести, и во исповедников

воинстве вчини вас Господь, да вси словене вопиют Ему о вас: Аллилуиа.

Икос 4

Слыша царь Козареск, яко истинная вера в стране еллинов исповедуется, испроси себе от царя Византийска учителей православия. Сей же умоли святых Кирилла и Мефодия оставити пустыню и плыти понтом Евксинским к козаром. К нимже пришедше, святая братия обратиша сердца их ко Христу и спасительное Крещение преподаша им. С темиже и мы прославим равноапостольных братьий, глаголюще:

Радуйтесь, не убоявшиися снити ко варваром с Евангельским благовестием; Радуйтесь, озарившии море славным своим тамо шествием. Радуйтесь, яко святого апостола Климента нетленные мощи от вас обретены быша; Радуйтесь, яко того помощью нечестие козарско от вас посрамися. Радуйтесь, яко свет Христов стране полуночной преподали есте; Радуйтесь, яко праведности ваша слава во вся концы земли распрострися. Радуйтесь, Церкви Христовы предстательство и утверждение; Радуйтесь, от ересей и расколов наше крепкое ограждение. Радуйтесь, от агарян и иудей приявшии за Христа укорение; Радуйтесь, от мощей мученика снискавшии благословение. Радуйтесь, почитанию угодников благим образом жития вашего нас научившии; Радуйтесь, и сами, яко угодницы Божии, от всех православных исповедуемии.

Радуйтесь, Мефодие и Кирилле, язык словенских апостоли и богомудрии учителяе.

Кондак 5

Боготечная звезда явился вам святого Климета нетленное тело, всплыв на волнах понта Евксинскаго, на егоже дне от семисот лет сокрыто лежаше. Вам же явил е есть творяй чудеса Господь в знамение трудов апостольских и скорбей исповеднических ваших. Еже разумеvше, возописте Богу: Аллилуиа.

Икос 5

Видевше святая братия соплеменные им словены истинную веру исповедующа, слово же Божие своим им языком чести не ведуща, потщашася Божественныя книги на язык словенск преллагати, да вси людие на сроднем им языке единого всех Господа прославят; темже и мы прославим Господа о святителех наших, имже возопиим:

Радуйтесь, подателие Христова света народом иноплеменным; Радуйтесь, просветителие словен, вам соплеменных. Радуйтесь, делателие винограда Христова; Радуйтесь, пастырие добрии стада Иисусова. Радуйтесь, слова Божия вернии толковницы; Радуйтесь, наши блазии и кротцыи учителяе. Радуйтесь, мир Христов с собою всюду пронесшии; Радуйтесь, мир весь светом учений ваших просветившии. Радуйтесь, и ныне приемлющии моления нас грешных; Радуйтесь, и ныне посылающии утешение печальным. Радуйтесь, всех, за истину угнетенных, прибежище; Радуйтесь, Духа Святаго пречестное жилище.

Радуйтесь, Мефодие и Кирилле, язык слоненских апостоли и богомудрии учителяе.

Кондак 6

Проповедницы богоноснии бывше, святая братия во страны словенския идоша просветити новокрещенныя люди Христовым учением. Тии же, узревше вас, яко ангелов светлых, спасение благовестити грядущих, яко пастырей добрых, душу свою за овцы полагающих, возопиша прославляющему святыя Своя Богу: Аллилуиа.

Икос 6

Возсиявшей в Моравии заре истинныя веры, испросиша князи словенстии от царя Византийскаго во страны своя учителя и утвердители людем. Сих же моления услышавше, святии Мефодий и Кирилл во страны словенския подвигошася, проповедающе Евангелие Царствия Божия словенским народом. Еже уведевше, возрадовашася словене и, отвсюду ко святым братьям притекающе, закону Божию поучахуся, Господа славяще и просветители своя хваляще, с нимиже и мы вкупе воспоим Мефодия и Кирилла, взывающе:

Радуйтесь, апостоли наши богоглаголивии; Радуйтесь, учителяи наши благодатнии. Радуйтесь, исповедницы наши, многое дерзновение имущии; Радуйтесь, пустынницы наши преподобнии. Радуйтесь, молитвенницы наши теплии; Радуйтесь, чудотворцы наши светлии. Радуйтесь, славити Бога всеми языки завещавшии; Радуйтесь, триязычную ересь добльственно обличившии. Радуйтесь, словеном в год скорби утешение; Радуйтесь, во обстояниих тяжких надеждо их и заступление. Радуйтесь, приносящии ко Владыце всех наши покаянныя

молитвы; Радуйтесь, и сами о нас к Нему выну молящихся.

Радуйтесь, Мефодие и Кирилле, язык словенских апостолы и богомудрии учителя.

Кондак 7

Хотяще изгнати вы из стран словенских, священницы латинстии оклеветаша вы пред епископом Римским. Егда же сей с мощми святого Климента пришедших вас узре и правоверие ваше и доброе житие уведe, абие посрами клеветавшия на вы корыстолюбцы, вас же именем Христовым благослови, поя Богу: Аллилуиа.

Икос 7

Дивнии апостолы явишася святая братия, не имущe покоя в трудех своих: святой бо Кирилл от подвигов многих изнемог, скоро по пришествии в Рим живот свой сконча. Святой же Мефодий ревностию брата своего укреплен и от папы Адриана благодатию архиерейскою почтен, к подвигом новым в Моравию и Паннонию возвратися, идеже труды множайшия понесе; имже дивящеся, воспоим святую братию, зовущe:

Радуйтесь, добрии слуги Христовы; Радуйтесь, яко даже до смерти верни истине пребыли есте. Радуйтесь, Господеви, а не человеком угождавшии; Радуйтесь, имене Его ради поношения от человек приявшии. Радуйтесь, чрез все житие на ниве Господней потрудившиися; Радуйтесь, и по смерти от паствы своея любовью не отлучившиися. Радуйтесь, свет миру и соль земли бывшии; Радуйтесь, яко светильник, горяй во тьме, языком светившии.

Радуйтесь, яко град верху горы, от верных и неверных не утайвуйся; Радуйтесь, заповеди Господни сотворшии и иных научившии. Радуйтесь, сего ради велии во Царствии Божиим нареченнии; Радуйтесь, на земли в Церкви Господней прославленнии.

Радуйтесь, Мефодие и Кирилле, язык словенских апостоли и богомудрии учителяе.

Кондак 8

Странно преставление святого Кирилла всем явися, не о жизни бо временней помышляше, но Господа о новопросвещенных им церквах моляше, да утвердит я в Православии и от триязычныя ереси и прочих напастей и бед оградит я, святого же Мефодия увещаваше, глаголя: “Се, брате, супруга волов бяхове, едину бразду тяжуща, и аз на лесе падаю, течение скончав; ты же любиши святую гору вельми, не мози убо горы ради оставити учения языков словенских”. Темже, толицей ревности святых братий дивящися, воспоим Богу: Аллилуиа.

Икос 8

Весь предан быв душею же и телом заветам брата своего, святой Мефодий не убоися прещений княжеских, ни клевет от иереев латинских, ни заточения темнична, но вся сия, яко доблий воин Христов, претерпевая, не преста языки словенския и паству свою добре правити и просвещати, дондеже в старости опочи и к святому Кириллу во блаженную обитель райскую преставися. К ним же мы воспоим тепле:

Радуйтесь, венцем терпения на земли венчаннии;

Радуйтесь, светом вечным на небеси осияннии. Радуйтесь, подвижницы, нищии духом, яко ваше есть Царствие Небесное; Радуйтесь, плакавшии много, яко обильно утешистесь. Радуйтесь, кротцыи, яко наследисте во Христе земли словенския; Радуйтесь, алкавшии и жаждавшии правды, яко насытитесь в селениих небесных. Радуйтесь, милостивии, яко не сами токмо помиловани есте, но и иным милости от Бога ходатаи бысте; Радуйтесь, чистии сердцем, яко днесь Бога лицом к лицу зрите. Радуйтесь, миротворцы человеком бывшии, яко сынове Божии нарекошестесь; Радуйтесь, изгнанныи правды ради, яко ваше есть Царствие Божие. Радуйтесь, яко возненавидени бысте от человек и гонение и клеветы прияли бысте Христа ради; Радуйтесь и веселитесь, яко мзда ваша многа на небесех.

Радуйтесь, Мефодие и Кирилле, язык словенских апостоли и богомудрии учителяе.

Кондак 9

Всякия козни, на страны словенския находящия, бодро разоряли есте, преподобнии, темже и ныне не оставите нас, смиренных и грешных, но вся словены в Православии и единомыслии утвердите, да вси едиными усты и единым сердцем вопиют прославившему вас Богу: Аллилуиа.

Икос 9

Вития многовещанная, яко рыбы безгласны, зрим о вас, преподобнии, недоумеют бо, како и в пустыни духом витали есте, и посреде человек неусыпными подвиги подвижастесь. Мы же, радуящестесь, яко таковыи имамаи учителяи и молитвенники,

прославляем вас, глаголюще:

Радуйтесь, истинныя веры исповедницы; Радуйтесь, Царствия Божия наследницы. Радуйтесь, ереси иконоборныя обличителие; Радуйтесь, иудейства посрамителие. Радуйтесь, триязычную ересь поправшии; Радуйтесь, словеном двери Царствия Небеснаго отверзшии. Радуйтесь, воины Христови, еще в житии от Него славою венчаннии; Радуйтесь, и в славе своей дух смиренномудрия соблюдшии. Радуйтесь, злая, яко Исаия и Иеремия, от единоплеменных за благая приявшии; Радуйтесь, яко Даниил и Есфирь, за язык свой ходатайствовавшии. Радуйтесь, со всеми святыми немерцающим светом осияваемии; Радуйтесь, со всеми угодники Божии о нас грешных Господу молящися.

Радуйтесь, Мефодие и Кирилле, язык словенских апостоли и богомудрии учителяе.

Кондак 10

Спасти хотя новое стадо Христово от волков мысленных, святой Мефодий на одре смертном ученики своя вельми моляще твердо стояти во истинней вере, ниже козней вражеских устрашатися, но и в скорбех и напастех за вся благодарити Бога, поюще: Аллилуиа.

Икос 10

Стена есте всем, о православии трудящимся, и заступление к вам с верою притекающим, Мефодие и Кирилле богомудрии, ибо небесе и земли Творец избра вас быти на земли ловцы человеком, послежде же на небесех к лику апостол сопричте. Темже и нам

умолите благодати Его даром податися, умиленно вопиющим таковая:

Радуйтесь, добродетельми, яко виссоном, украшении; Радуйтесь, в премудрости с Соломоном сравнившиися. Радуйтесь, воздержанием и молитвою великим Антонию и Пахомию уподобльшиися; Радуйтесь, яко Великий Василий и Иоанн Златоустый, силою слова одареннии. Радуйтесь, яко целомудрием Иосифу подобни бысте; Радуйтесь, терпению Иовлему подражавшии. Радуйтесь, незлобием царю и пророку Давиду соревновавшии; Радуйтесь, ревностию по вере Илии уподобившиися. Радуйтесь, яко, подобно Павлу и Иоанну Богослову, Христа Бога возлюбили есте; Радуйтесь, яко Даниил и трие отроцы, мужественно Бога прославившии. Радуйтесь, яко ангелом и святым Божиим сожительствуете; Радуйтесь, яко и мы грешнии имя ваше с верою призываем.

Радуйтесь, Мефодие и Кирилле, язык словенских апостоли и богомудрии учителяе.

Кондак 11

Пение благодарное приносяще ко Господу, предстателие нам грешным вас даровавшему, со умилением молим вы, святии учителяе наши, не возгнушати нас лености ради нашея, ниже отступить от нас тяжких ради беззаконий наших, но милосердие от Господа всем испросити, вопиющим Ему о вас: Аллилуиа.

Икос 11

Светозарную апостол словенских двоицу восхваляюще, вернии, устранимся своих распрей и

раздоров, паче же разделений в вере, единение же духа в союзе мира блюдуще, воспоим святых учителей тако:

Радуйтесь, громогласныя трубы Евангельскаго благовестия; Радуйтесь, гусли сладкозвучныя проповеди спасения. Радуйтесь, крепцыи правды насадителие; Радуйтесь, непоколебимии неправды истребителие. Радуйтесь, радости податели всем бывшии; Радуйтесь, скорбей нападения отвсюду восприявшии. Радуйтесь, мзды и воздаяний трудом своим от человек не искавшии; Радуйтесь, о неблагодарных людех Богу молившиися. Радуйтесь, ангел Божиих и святых Его подвиги и добродетельми своими радовавшии; Радуйтесь, радости вечныя купно с ними во обителях блаженных наслажденнии. Радуйтесь, звезды, светом истины сияющия; Радуйтесь, сами добродетелей ваших светом осияннии.

Радуйтесь, Мефодие и Кирилле, язык словенских апостоли и богомудрии учителяе.

Кондак 12

Благодать единения и мира испросите нам, преподобнии, и мир во всем мире до конца мирскаго жития вашего благовестившии, яко да и мы, от всех расколов и искушений свободшеся, в мире воспоим, яко други, вас возлюбившему единому миротворцу всех Господу: Аллилуиа.

Икос 12

Поюще ваше дивное житие на земли и славу, яже на небеси, помышляюще, смиренно молим вас, святии учителяе, силу свыше православным

христианом на враги невидимыя и видимыя даровавшия, и народы словенския в единение веры приведшия, вси воспевают, верно взывающе:

Радуйтесь, православия твердое ограждение; Радуйтесь, неверия живое обличение. Радуйтесь, исхождение Духа Святаго от Отца точию, яко отдревле прияхом, исповедавшии; Радуйтесь, службу Божию совершати комуждо своим еси языком завещашии. Радуйтесь, праведных в праведности утверждение; Радуйтесь, и беззаконных к закону обращение. Радуйтесь, яко вами и мы во исполнение Церкви внидохом; Радуйтесь, яко вами слово Божие на сроднем нам языке достиже. Радуйтесь, яко молитвами вашими, аки забралом крепким, от врагов наших ограждаемся; Радуйтесь, яко предстательством вашим вечныя жизни сподобляемся. Радуйтесь, всем словеном пастырие и отцы, ихже ради есмы вси братие; Радуйтесь, яко вас ради братия суще по плоти и по духу братия Христу сотворихомся.

Радуйтесь, Мефодие и Кирилле, язык словенских апостоли и богомудрии учителяе.

Кондак 13

О пречуднии и предивнии язык словенских учителяе, святии равноапостольнии Мефодие и Кирилле, нынешнее приемше моление наше, вся словены от находящих им зол и бед свободите, в мире и единении соблюдайте и к Царствию Небесному предстательством вашим приведите всех, во умилении о вас поющих Богу: Аллилуиа.

(Этот кондак читается трижды, затем икос 1 и кондак 1)

Икос 1

Ангелов Творец и Господь сил предустави вас быти просветители языком словенским; того ради и благодать Его бе с вами, ограждаючи и укрепляючи вас во вся дни живота вашего юже помощницу себе имуще, славу Божию во градах и пустынях делы и словесы вещали есте всем. Темже и мы, яко отрасль язык, верою Христовою от вас просвещенных, воспеваем вам, глаголюще:

Радуйтесь, радости Евангельския благовестителие;
Радуйтесь, чудодейственныя благодати носителие.
Радуйтесь, скорби многи за имя Господне приявши;
Радуйтесь, прелести мира сего отвергшии. Радуйтесь, издетска Богом благословеннии; Радуйтесь, венцы исповедническими от Него украшеннии. Радуйтесь, яко славу человеческую презревше, в пустыни Господа искали есте; Радуйтесь, яко волю Его сильным мира сего со многим дерзновением благовестили есте. Радуйтесь, сих ради от Владыки всех в рай светел прияти; Радуйтесь, пред Ним наши теплии ходатаи. Радуйтесь, яко вашими молитвами вере нашей утверждение имамаы; Радуйтесь, яко предстательством вашим ересей одоление стяжахом.

Радуйтесь, Мефодие и Кирилле, язык словенских апостоли и богомудрии учителяи.

Кондак 1

Избранныи от Царя сил Господа Иисуса во апостоли языком словенским, Мефодие и Кирилле богомудрии, песньми восхваляем вас, предстателей наших; вы же, яко имуще дерзновение ко Господу, от всяких нас

напастей предстательством вашим свободите, зовущих: Радуйтесь, Мефодие и Кирилле, язык словенских апостоли и богомудрии учителяе.

Молитва первая

О преславнии язык словенских учителяе и просветителие, святии равноапостольнии Мефодие и Кирилле. К вам, яко чада ко отцем, светом учений и писмен ваших просвещеннии и в вере Христовой наставленнии, ныне усердно прибегаем и в сокрушении сердец наших молимся. Аще бо и завет ваших, яко чада непокоривая, не соблюдохом и о угождении Богу, якоже учисте, небрегохом, и от единомыслия и любви, юже словеном, яко братьям в вере и по плоти, добре завещаете, отпадохом, обаче, якоже древле в житии вашем неблагодарных и недостойных не отвращаете тщи, но благими за злая воздавате, тако и ныне грешных и недостойных чад ваши молитвы не отвратите, но, яко велие имуще дерзновение ко Господу, прилежно Того молити, да наставит и обратит нас на путь спасения, распри же и раздоры, посреде единоверных братии возникающия, умирит, отпадшия паки во единомыслие приведет и всех нас единением духа и любви во единей, Святей, Соборней и Апостольстей Церкви соединит. Вемы бо, вемы, яко много может молитва праведника ко благосердию Владыки, аще и о грешных людех приносима бывает. Не оставите убо нас, унылых и недостойных чад ваших, ихже грех ради паства ваша, вами собранная, враждою разделяема и соблазны от иноверных прельщаема, умалися, овцы же ея

словесныя разсеваемы, от волков мысленных восхищаются, дадите убо нам молитвами вашими о православии ревность, да ею возгреваеми, отеческая предания добре сохраним, уставы и обычаи церковныя верно соблюдать потщимся, всяких лжеучений странных отбежим и тако, в житии богоугодном на земли преспевающе, жизни райския на небеси сподобимся, и тамо с вами вкупе Владыку всех, в Троице Единого Бога прославим во веки веков. Аминь.

Молитва вторая

О всехвальнии равноапостольнии Мефодие и Кирилле, припадающе пред честною иконою вашею, усердно молим вы: воззрите милостивно на нас, ихже трудом вашим просветили есте, и оградите нас неусыпным предстательством вашим от злых козней вражиих! Призрите убо на виноград сей, егоже насадили есте, и не предайте дивеему веprü озобати его. Сохраните, святии угодницы Божии, Церковь нашу Православную, юже вы наздали есте на краеугольном камени, Христе, яко да будет недвижима, но да разсыпятся о камень сей волны всякаго маловерия. Укрепите пастырей наших во всех добродетелех и в подвизе проповедания, вразумите же пасомых, во еже послушати гласа их. Сохраните вся страны словенския от всякаго оскудения, от огня и меча, от смертоносныя язвы и от всякаго зла. Услышите и всякаго человека; с верою к вам приходящаго и благодатныя помощи вашея требующаго. В страшный же час смертный

предстаните всем нам блазии ходатаи и темных
зраков демонских прогонителие, да в мире и
покаянии скончавше земное поприще, достигнем
вечных благ наслаждения и купно с вами прославим
Пресвятую Троицу — Отца и Сына и Святаго Духа,
ныне и присно, и во веки веков. Аминь.